


مکرمین و اهل الصلی

ادبی و سیاسی رسالهٔ اسبوعیه در

۳۱ نجی سنه



۱۲ شوال ۱۳۲۹

پنجشنبه

جزء عدد : ۱۱۵

یگر منجی عصرک اهل صلیبی

جزوئی ادراکی اولانلر بیلله قبول و تسلیم ایدرلرکه بوگون شرق و غربده
بولنان دول اسلامیه روا کوریلان معامله صلیب ایله هلالک مصادمه‌سندن ،
صلیبک هلاله غلبه‌سنی اظهار و اثبانه چالشمقدن بشقه برشی دگلدر .
ایران موسقوفلرله انکلیزلر آرمسند تقسیم اولدی . بغداد و ایران خطنده
آلمانلرله موسقوفلر اوزلاشدی . قاس فرانسلرله ، قونغو طرفلری آلمانلر
و بو تقسیم فرنیکده طرابلس غرب ایٹالیانلرله افراز ایدلدی .
برکره شو اوتوز بش سنه ظرفنده ملکجه اولان ضایعاتمزی پیش نظر
آلیرسحق ظاهر اولورکه برلین قونفرمسی مقرر راتیله المزدن چیقان برلر ایله برلین
معاهده‌سینک عقد و امضاسندن صکره المزدن آنان برلر ممالک موجوده مزک
عشرینسه مقارب و حتی روسیه محاربهٔ اخیره‌سیله ضایع ایتدیکمز برلر کیه
غالبدر .

دولت عثمانیه بی آناتولیده. موسوقو تجاوزاتندن مصون بولندیرمق ایچون
قبریس جزیره سنی بالمقاوله تفوض ایتمش اولان انکلتزه، بر قاج سنه صکزه مصره
استیلا ایلدی. سودانی تملک ایلدی.

اسماعیل پاشا زماننده بر لزوم اقتصادی یه مبنی سواکن ایله مصوعک، فقط
ادراء ملکیمسی حکومت مصریه یه تودیع اولغش ایلدی. انکلیزلر مصری استیلا لرندن
صکزه، ملک موروث و یا مفتوحلری ایتمش گبی، مصوعی ایتالیایه بخش
ایلدی.

مصر استیلا سندن ایکی سنه مقدم ده فرانسزلر حق حاکمیتی حاز اولدیلغز
تونس امارتی (حمایه) نامنه تملک ایلشدی.

مصر استیلا سنی ایسه شرقی روم ایلینک الحاقی تعقیب ایلدی.

مسائل معلقه سیاسیه نك تصفیة حسابی مقصدیله برلین قونفره سینک مواد
مقرره سندن اولان قره طاغ و یونان تصحیح حدودی ماده لری دول متعاهده یه
وکاله انکلتزه نك جبره قریب بر معامله سطوتکارانه سیله اجرا و بودغور یجه ایله
بار قره طاغه، تر حاله ایله یکیشهر یونانه ویردیرلدی.

گویا برلین قونفره سینک — حلی استقباله ترك اولغش اولان — مواد معلقه سی
بوصورتله تسویه ایدلمش و دولت عثمانیه یه، ینه برلین مقر راتندن اولان اصلاحات
داخلیه سیله مشغول اوله جق وقت قزاندیرلمش ایدی.

فقط آرمدن بر قاج سنه کچر کچمز (واصو) اسمنده بر زوربا، بر طابور یونان
عسکرینک باشنه کچره کزیده نخطی ایله آطه نك یونانه الحاقی اعلانه جراثیب
اولدی. او تار یخدن بو گونه قدر اون درت سنه در کرید اهل صلیک اک مهم
عناصرندن اولان درت دولتک — که ایچلرنده بوگون پیش احتراصنده بولندیلغز
ایتالیا حکومت باغیمسی ده داخلدر — ایدی امانته ودیعه قلمشدر.

بو تجاوز ناکهانی اوزرینه بحق یونانه اعلان حرب ایتدک و مظفر آ تسلیایه
کیردک، اگر بسمارقک نظریه سی حکمنجه (حق) قوتدن عبارت ایدیسه، آتی
ابراز ایله اثبات استحقاق ایلشدک.

نه‌فانده که مظفریت واقعه - ولو قوته مستند اولسون - عقیم قالدی .
 و بر یونان پرنسنگ آطیه حاکم منتخب صفتیه اعزام واقامه سنه منجر اولدی .
 شو وقایع مجله دن تحقیق ایدورکه (شرق مسئله سی) دینلان ماده بر مسئله
 اسلامی دن عبارتدر . و بونده کی مقصد و غایه ایسه صلیبک هلاله غلبه سی استحصال
 ایتمک و هر وسیله دن انتهاز فرصتله حکومت اسلامی بی برر برر تپمک ، از مک ،
 قوتلرینی کسر ایتمک ، ایلر طوتار یرلرینی براقیه جق قدر زیون دوشورمکدر .

بوگون ایسه دول اسلامی نك الك معظمی دولت عثمانیه اولدینی و ارج قطعه نك
 اوچنده ده حائر قدرت بولندینی جهتله بالطبع دول سائر اسلامی نك هیچ بریله
 مقایسه ایدیله میه جک بر حال و موقعه در . خصوصاً کره ارضه بولنان ایکی یوز
 میلیونه قریب اهل اسلامک رابطه معنویه سی جبل متین خلافتله مشید بولندیغندن
 اوروبالیرجه شرق مسئله سینک ، یعنی مسئله اسلامی نك حکمی سلطنت عثمانیه نك
 انحلالیله حصول پذیر اوله جفته یقین حاصل اولمش و بنسأ علیه آرهلرنده بر نوع
 (اتفاق مقدس) عقد ایدلمشدرکه روم یلنده یدی سکر سنه دن بری ایقاع ایدیله کلان
 فسادلر ، تجاوزلر ، دولتی عاجز براقیه جق حیدودقلر هپ او اتفاقک صورت
 تطبیقه سندن عبارتدر . حتی الك صکره (ره وال) ملاقاتی بیله بومقصده واقع
 اولمش ایدی .

بوراسی جای نظر و بالخاصه جای تأسفدرکه (ره وال) ملاقاتنک اساسی ،
 سلطنت سنییه حقنده الك خیر خواه بر ملت اولان انکلیز لرك حکمداری
 حاضرلمشدی .

اوملت ، که یارم عصر مقدم بیه بو عثمانی سلطنتینک ادامه موجودیتی ایچون
 بحار محیطینی آشرقی بحر سیاهی دونمسیله طولدیرمش و سیواستوبولک طراقة
 انهدامیله عثمانیلرک آوازه شکرانی بر آنده ادراک ایدرک نائل کام اولمشدر .
 ایشته ره وال ملاقاتی عثمانیلری روم یلندن چیقارمرق اوروپا قطعه سیله علاقه منزی
 کسمک مقصدینه مستند ایدی . آندن براز اولده آفریقایله اولان رابطه مزک
 فکی ماده سی ایتالیا ایله قرارلشدیرمش اولدقلری شمعی افشا و اظهار اولنیور .

بوحق قدر که بوگون عرب اولسون ، آرناوود اولسون ، بوشناق و جیتاق اولسون بزدن ماده آبرمش اولان برلرده کی مسلمانلر بر درجه قدر محافظه موجودیت ایتسه لرده ابراز قوت و اهمیت ایدمزلر . آنلرک یار و اغیار عنندنه خاطرنی صایدیران شی آنجق ترکلرک قدرت قاهرانه لریدر که ایشته اوروبالیر آنی کسر و افنایه متحداً چالشمقده درلر .

بز دعوی بلا دلیلده بولمئورز ؛ ایشته قریم ، ایشته قفقاس ، ایشته جزایر ، ایشته تونس ، ایشته مصر ، ایشته بلغارستان ، ایشته بوسنه و هر سگ ! بوسایدنمزلر برلرده کی مسلمانلرک مقداری بوگون رایت عثمانیه آلتندہ مجتمع اولان اهل اسلامک عددینه قریبدر . عجبا هانکیسنه اهمیت ویرلمکده در ؟ شو حالده اوروبالیرجه بزدن رابطه لری فک ایدیلاں مسلمانلرک قطعاً حکمی یوقدر . چونکه بوقوملر و هله عربلر - نه قدر آزاده سرانه یشامغه مألوف ایسه لر اورتبه خصیصه اجتماعیدن بی نصیب اولدقلرندن - بر آرمه کلوبده اظهار موجودیت و استحصال حق قدرتیاب اوله مازلر . آنلرک فطرتلرنده خاصه حاکیت یوقدر . بو خصیصه یی قدرت ازلیه ترکلره رایکان قیلش . خصوصاً عربک ، ظهور اسلامدن اولکی زمانلردن بری عشرتله آرسنده جایگیر اولان و اکثری داعیه شرفدن منبعث بولنان مخاصمه لری عصرلردن بری آبادن اولاده انتقال ایدم کلش بر داء عضالدر ، که آکا مدنیت اسلامیه نك بشدیردیکی اطباء سیاست بیله دواساز اوله مامشدر .

هر نه وقت جزایرده بین القبائل بر (غزو) واقع اوله جق اولسه فرانمزلر هرایکی طرفی تشجیعدن بشقه برشی یابماز . چونکه طرفیندن قیریله جق افراد ، افراد مسلمدر .

بو حقیقتلر میداند و هر طرفده بولنان اسلامک استیلای جهل و نادانی ایله دوشمش اولدقلری وادی سقالات انکار قبول ایتیجه چک بر حالده ایکن معاذالله تعالی بزدن بر صورتله ارتباطلری فک ایدیله چک اقوام مسلمنه نك گرفتار ذل و هووان اوله جقلری شک کوتورمن حالدرند .

طرابلس نه اوله جق ؟

اوت ! طرابلس نه اوله جق ؟ سؤالی هر صاحب ادراک مسلمان اوله نفسندن .
صکرم بر برندن صور مقده در .

بکا قالیرسه طرابلس نه اوله جقدن اول طرابلس نیحون بویله اولدی ؟
سؤالی ایراد ایتلی و ماضیسی اوگر ندکن صکرم مستقبلی کشف ایدملیدر .
طرابلسک گونک برنده شمعی ادراکیله دلخون اولدیغز بلایه کرفنار اوله جغنی
بز نیجه ایامدن بری بیلور ایدک . آتی ده بیلور ایدک که بیلدیز دینلان و بر بلیه
آسمانی کبی بو خلقک باشنه هر کون بیگ درلو فلاکت یاغديران قدرت مطلقه
جانی نه ایسترسه آتی یاپار و خلق طرفدن هر نه طلب اولورسه آتی یاماز .
و بلکه عکسی التزام ایدر . آنک اخص مطالبی زماتی غائله سر کچیرمک و ابدن
صکرم طاش طاش اوستنده قالمسون قضیه سنه اتباع ایلک ایدی . بوجهتله طرابلس
کبی - آرده کی رابطه و صلیه سی برید اجنبیه کچمش - بر ایالت بعیده نک
ایلروده نه اوله جغنی دوشنهرک چاره دافع حاضرلمسنه امکان یوقدی . آره صره
راسم پاشا و یا رجب پاشا کبی بر صاحب فطانت و حمیت انه دوشرسه برشیلر
یایله بیلردی . حتی دیورلرکه ایتالیا حکومتیله عبدالحمید آره سنده طرابلس مسئله سی
اون سنه اول حل اولمش مسائلدندی . نه کیم بوسنه وهرسک مسئله سی دخی
اوقیل مسائلدن ایدی .

فقط ۱۹۰۸ سنه سی تموزینک یگرمی اوچنجی گونندن ۱۹۱۱ سنه سی
ایلولنک ۲۸ زینه قدر بز طرابلسده نه یایدق ؟ آتی امکان داره سنده معنی و ماده
تحکیم ایده جک هانکی اسبابه تشبث ایلدک . هانکی وساطتی تطبیق ایدک ؟
کورپور ایدک که طرابلس ایتالیا نلرک یگرمی بش سنه دن بری فرصت کوزندکلری
برقطه و اسعه در . و (ساردونیا) نامندن (ایتالیا) عنوانسه انقلاب ایلدکلری
گوندن بری بو قطعه مطبخ نظر لیدر .

بو ولایتک نه وسعتده اولدیغنی عجا هر عثمانلی بیلورمی ؟ هر کیم براطلس

آچوبده شویله سطحیجه نظر انداز اوله جق اولورسه گوریرکه طرابلس غرب
ایالتی فرانسه‌نک ایگی و ایتالیا دینلان (حکومت حیدودیه) نك مالک اولدینی
طوبراغك تام ۴ مثلنه مساویدر . و اول قدر قابلیت اعماری حازدرکه جزایر
و تونس ایالتلری آنك یاننده هیچدر .

وقتیله رومالیرله اوتوز سنه محارب اولمش و آنیال‌گی شجاعت و حیثیت تمثال
مشخصی ارلر ، انسانیته شرف و یرن سرورلر یتشددیرمش اولان (قارتاجه)
بوطوبراقلرله خالط و مخلوط ایدی .

ترکلرک بر اسکی مثلی واردر :

باصقیسز تختینی ایل آلیر ، ایل آمازسه یل آلیر .

دیرلر . طرابلس غربك ماضی بعید و قریبه عاقد احوالندن بحث ایتیمه جکمز .
چونکه فائده و برمز . و اوزرلرینه مسئولیت ترتب ایدنلرله کچمز . فقط شوبدایت
مشروطیتدن بری ، هله بر بچق سنه ظرفده اورالرك احوالنه دائر اوراق حوادنده
نشر اولنان فریاد نامهلر . ایفاظلر ، اخطارلر اوزرینه نه‌گی تدبیرلرده بولندق ؟
عسکریمی گوندردك ؟ مهمانی سوق ایتدك ؟ ارزاقی ارسال ایلدك ؟ استحکاملرینی
تعمیر و تکثیرمی ایتدك ؟ بونلر انضباطی و عسکرى خصوصلردر .

اجتماعی و اقتصادی خصوصلارندن نه‌یایدق ؟ مکتبلر ، یوللر ، بانکلر خسته‌خانلر ،
دارالصناعه‌لرمی وجوده کتیردك ؟ (بانقودى روما) نك اهاالی‌یه پارملر طاغندیغنی
غزتلر دفعاتله یازدی . زراعت بانکه‌سنی یاخود دولتك نامنی لکدار ایتمکدن بشقه
فضیلتی معلوم اولمیان عثمانلی بانکه‌سنی بویالیان بانکه‌سنك تشبثات مالیه‌سنی عقیم
براقه‌جق وسائلی احضارهمی تشویق ایتدك ؟ حاصلی ایتالیانلری داعیه مکروهه‌لرنده
مخطی گوسترمه‌جك و تجاوزات مصصمه‌لرینه حائل اوله‌جق نه‌یایدق ؟

قول اوغلی طائفه‌سنی . که ذاتاً برنوع (میلیس) عسکرى قیمت و مزیتینی حازر
شجعاندنلرله تسلیح و تعلیم می ایتدك ؟

بوندن ۴۰ سنه اول ارزنجانی عزت پاشا مرحومك والیلكی هنكاملنده

مشار اليه کيسه سندن (مولوديه) نامنده بر واپور آلهرق مالطه ايله طرابلس
آراسنده ايشلتش و دولتش پوسته سي بوسايده وسائط اجنبيه عرض افتقار
ومتدن قورتلش و طرابلسليرده بوسيله ايله رأيت عثمانيه نك بر سفينه اوزنده
توجنی مشاهده ايله قريرالعين اولمش ایدی . او واپورک مرور زمان ايله انحلال
اجزاسندن صکره زوالی طرابلسلير بر عثمانی واپوری کورمامشدر .

اقتضا ايندکجه سوقيات عسکريه مزی بيله اجنبی ، حتی ايتاليا واپورلريله
اجرا ايدوردق . بونلر نه بيوک ذل ، نه التيام ناپذير جريحه لردير . ايشته بيئه
دولتک وهن و خرابيه بونلر ياردم ايديور . ايشته يکرمنجی عصرک اهل صليبي
بزم بوقيدسز قلرمن تشجيع ايديور .

بر يونان واپورينه تحمیل ايتديکمز ييلم قاج بيک کيله بغدادک بلا عارضه
وصولندن بحث ايديليور . بلا عارضه وصولی بزده تصديق ايدرز . فقط يونان
واپوری ارزاق چيقارديغنی حکومت اثباته قدرتياب اوله ماز صانيرز . چونکه واپور
اورايه واصل اولور اولماز ايتاليا قونسولوسی ، تبعه سی ارکاب ايله حمله سی
بوشالتمسزين ايتاليابه سوق ايتمش .

دها غریبي بوگون اوراده کی عثمانی بانقہ سی شعبه سنده طوبی (۹۰۰۰)
ليرا وارمش . یعنی عساکر عثمانیه یی ارزاق ایچون لازم گلان حوايجی تدارک
مصروف اوله جق مبلغ طوبی ۹۰۰۰ ليرادن عبارتدر . بونی رفقا مزدن طرابلس
مبعوثلری بالذات تحقیق و اخبار ايتديلر .

ايشته بونلر برر حقیقت مرارت آمیزدر که تأثیری سم قاتلن اشددر .

ابوالضیا

